

Na osnovu člana 24. stav 1. tačka c) Ustava Tuzlanskog kantona («Službene novine Tuzlansko-podrinjskog kantona», broj: 7/97 i 3/99 i «Službene novine Tuzlanskog kantona», broj: 13/99, 10/00, 14/02, 6/04 i 10/04), na prijedlog Vlade Tuzlanskog kantona, Skupština Tuzlanskog kantona, na sjednici održanoj _____ 2007. godine, donosi

Z A K O N

O IZMJENAMA I DOPUNAMA ZAKONA O MINISTARSTVIMA I DRUGIM ORGANIMA UPRAVE TUZLANSKOG KANTONA

Član 1.

U Zakonu o ministarstvima i drugim organima uprave Tuzlanskog kantona («Službene novine Tuzlanskog kantona», broj: 17/00, 3/01, 12/03 i 10/05), član 7. mijenja se i glasi:

- « Ministarstvo pravosuđa i uprave vrši upravne i druge stručne poslove koji se odnose na:
- obezbjeđivanje primjene najviših standarda ljudskih prava i sloboda utvrđenih međunarodnim aktima, ustavima, i zakonima u oblastima iz nadležnosti Ministarstva;
 - praćenje i proučavanje stanja i pojava u pravosudnim organima u Kantonu, te predlaganje i preduzimanje potrebnih mjera u skladu sa zakonom;
 - praćenje organizacije rada i poduzimanje odgovarajućih mjera u cilju obezbjeđivanja materijalnih uslova za rad pravosudnih organa u Kantonu;
 - praćenje rada sudske uprave i preduzimanje odgovarajućih mjera za unapređivanje rada te uprave;
 - praćenje primjene propisa iz oblasti krivičnih i prekršajnih sankcija i izvršenja odluka kantonalnih i federalnih sudova;
 - organizovanje i način rada organa uprave i upravnih organizacija Kantona;
 - praćenje rada organa uprave i upravnih organizacija Kantona, preduzimanje i predlaganje odgovarajućih mjera za unapređivanje, racionalizaciju i efikasan rad tih organa i organizacija;
 - praćenje primjene propisa o općem i posebnim upravnim postupcima, kancelarijskom poslovanju, radnim odnosima državnih službenika i namještenika u kantonalnim organima uprave i upravnim organizacijama, te sačinjavanje odgovarajućih analiza, informacija i izvještaja u vezi s tim;
 - praćenje organizacije i rada općinskih službi za upravu na koje je preneseno vršenje poslova iz nadležnosti Kantona;
 - registraciju udruženja čije je područje djelovanja na području Kantona;
 - provođenje postupka koji prethodi imenovanju notara, postavljenju zamjenika notara i vršioca dužnosti notara, kao i popunu mjesta notarskih pomoćnika, te rješavanje o njihovim statusnim pitanjima, kada je to zakonom i drugim propisima određeno;
 - kontrolu ispunjavanja određenih materijalno-tehničkih pretpostavki za rad notara i određivanje dana početka rada notara i radnog vremena notara;
 - pripremanje nacrtu zakona i drugih propisa iz nadležnosti Ministarstva;
 - rješavanje o upravnim stvarima iz nadležnosti Ministarstva;
 - vođenje propisanih službenih evidencija;
 - inspekcijski nadzor u oblastima iz nadležnosti Ministarstva;

- vršenje i drugih poslova iz ovih oblasti, u skladu sa zakonom, kao i poslova koji ne spadaju u nadležnost drugog organa uprave Kantona.».

Član 2.

U članu 8. stav 1. alineja 3. iza riječi «srednje», dodaju se riječi «srednje stručno obrazovanje, obrazovanje za obavljanje vezanih obrta, obrazovanje odraslih,».

Iza alineje 10. dodaje se nova alineja 11. koja glasi:

«- provođenje propisa iz oblasti sigurnosti saobraćaja na putevima u Bosni i Hercegovini, u dijelu kojim su utvrđene nadležnosti Ministarstva;».

Alineje od 11. do 22. postaju alineje od 12. do 23.

U alineji 23. koja postaje alineja 24. iza riječi «Ministarstva», dodaju se riječi «i donošenje provedbenih propisa kada je to zakonom određeno;».

Iza alineje 24. koja postaje alineja 25., dodaje se nova alineja 26. koja glasi:

«- izdavanje isprava iz nadležnosti Ministarstva i vođenje propisanih službenih evidencija;».

Alineje od 25. do 27. postaju alineje od 27. do 29.

Član 3.

U članu 10. stav 1. alineja 8., iza riječi «plaća», dodaju se riječi «za sve budžetske korisnike i ostale za koje je posebnim propisima utvrđeno da Ministarstvo vrši obračun plaća».

Član 4.

U članu 17a. dodaje se stav 2. koji glasi:

« Samostalna upravna organizacija je Kantonalni zavod za pružanje pravne pomoći.».

Član 5.

Iza člana 18a. dodaje se član 18b., koji glasi:

«Član 18b.

Kantonalni zavod za pružanje pravne pomoći vrši stručne poslove pružanja pravne pomoći fizičkim osobama slabog imovnog stanja kao samostalna upravna organizacija.

Kantonalni zavod obavlja slijedeće poslove:

- davanje pravnih savjeta;
- sastavljanje različitih podnesaka (tužbe, molbe, zahtjevi, predstavke, prigovori, žalbe i dr.);
- sastavljanje različitih isprava;
- zastupanje stranaka u svim parničnim, upravnim i ostalim postupcima pred sudovima i ostalim organima Kantona;
- odbrana i zastupanje u krivičnom postupku;
- pružanje drugih oblika pravne pomoći fizičkim licima kako bi se zaštitila njihova prava i interesi.».

Član 6.

Iza člana 35i. Dodaje se novi član 35j.koji glasi:

«Član 35j.

Kantonalni zavod za pružanje pravne pomoći počinje sa radom danom imenovanja direktora zavoda.

Direktor Kantonalnog zavoda za pružanje pravne pomoći dužan je donijeti Pravilnik o unutrašnjoj organizaciji Kantonalnog zavoda u roku od 30 dana od dana njegovog imenovanja.».

Član 7.

Ovaj Zakon stupa na snagu osmog dana od dana objavljivanja u «Službenim novinama Tuzlanskog kantona».

Bosna i Hercegovina
Federacija Bosne i Hercegovine
TUZLANSKI KANTON
Skupština

Predsjednik
Skupštine Tuzlanskog Kantona

Mr. sci. Amir Fazlić, v.r.

Broj: _____
Tuzla, _____ 2007. godine

OBRAZLOŽENJE
uz Zakon o izmjenama i dopunama Zakona o ministarstvima i drugim organima uprave
Tuzlanskog kantona

I - PRAVNI OSNOV

Pravni osnov za donošenje Zakona o izmjenama i dopunama Zakona o ministarstvima i drugim organima uprave Tuzlanskog kantona, sadržan je u članu 24. stav 1. tačka c) Ustava Tuzlanskog kantona («Službene novine Tuzlansko-podrinjskog kantona», broj: 7/97 i 3/99 i «Službene novine Tuzlanskog kantona», broj: 13/99, 10/00, 14/02, 6/04 i 10/04), kojim je utvrđeno da Skupština donosi zakone i ostale propise neophodne za izvršavanje nadležnosti Kantona.

II - RAZLOZI ZA DONOŠENJE ZAKONA

Zakon o ministarstvima i drugim organima uprave Tuzlanskog kantona, koji je Skupština Tuzlanskog kantona donijela 18.11.2000. godine, tri puta je noveliran. Prve izmjene i dopune manjeg obima izvršene su 12.3.2001. godine, druge sveobuhvatnije promjene kojima su osnovane nove uprave ili upravne organizacije, ali i izmjenjena nadležnost pojedinih kantonalnih organa, 4.11.2003. godine. Zakon je posljednji put noveliran 24.11.2005. godine, usvajanjem Zakona o izmjenama i dopunama Zakona o ministarstvima i drugim organima uprave Tuzlanskog kantona («Službene novine Tuzlanskog kantona», broj: 10/05).

Kako se ponovo ukazala potreba za izmjenama i dopunama tog Zakona, programom rada Skupštine, Vlade i Ministarstva pravosuđa i uprave Tuzlanskog kantona, predviđeno je njegovo usklađivanje sa važećim propisima, ali je takođe predviđeno osnivanje i nove upravne organizacije u Tuzlanskom kantonu.

U tom cilju, Ministarstvo pravosuđa i uprave je našima aktom broj. 06/1-02-3217/07 od 27.7.2007. godine, tražilo izjašnjenje svih kantonalnih organa uprave o potrebi mijenjanja važećeg Zakona, naročito u dijelu kojim je utvrđena nadležnost pojedinih kantonalnih organa uprave, kako bi se njihovi prijedlozi ugradili u tekst Zakona.

III – OBRAZLOŽENJE POJEDINIH RJEŠENJA

Član 1. Ovim članom je izmijenjen član 7. kojim se utvrđuje nadležnost Ministarstva pravosuđa i uprave Tuzlanskog kantona, obzirom da je ista, u odnosu na ranija rješenja, u velikoj mjeri izmijenjena, posebno u odnosu prema pravosudnim organima.

Član 2. Imajući u vidu da je donošenjem Zakona o osnovama sigurnosti saobraćaja na putevima u BiH («Službeni glasnik BiH», br. 6/06, 75/06 i 44/07) i podzakonskih akata iz ove oblasti, odnosno Pravilnika o uvjetima i načinu dobijanja licenci («Službeni glasnik BiH», broj 12/07), Pravilnika za sticanje zvanja vozača-instruktor motornih vozila («Službeni glasnik BiH», broj 15/07) i Pravilnika o osposobljavanju za vozača motornih vozila («Službeni glasnik BiH», broj 15/07), predviđeno da kantonalna ministarstva nadležna za obrazovanje obavljaju poslove implementacije ovih propisa, neophodno je bilo dopuniti nadležnost ovog Ministarstva, definiranu članom 8. Zakona o ministarstvima i drugim organima uprave Tuzlanskog kantona.

Pored navedenog, federalnim i kantonalnim Zakonom o obrtu, utvrđena je nadležnost Ministarstva obrazovanja, nauke, kulture i sporta za donošenja programa za polaganje majstorskog ispita, kao i ispita o stručnoj osposobljenosti za obavljanje vezanih obrta, zatim za obavljanje nadzora nad zakonitošću organiziranja i provođenja majstorskog ispita i određivanje stručne spreme kojoj se mogu priznati prava koja imaju osobe sa položenim stručnim ispitom.

Član 3. Izvršeno je preciziranje odredbe, kojom se definira način obračuna plaća budžetskim korisnicima.

Član 4-6. Pored navedenog, ovim Zakonom se osniva Kantonalni zavod za pružanje pravne pomoći, kao samostalna upravna organizacija. Cilj osnivanja ovog zavoda je da Tuzlanski kanton ispoštuje standarde Evropske unije u pružanju pravne pomoći osobama slabog imovnog stanja, te omogućiti ostvarenje prava na pristup sudu koje je zagwarantirano članom 6. Evropske konvencije o ljudskim pravima. Takođe, formiranje zavoda predstavlja neizostavni dio cjelokupne reforme pravosuđa i pomoći sudovima da efikasno i u što kraćem roku rješavaju postupke u svim vidovima sudskih referata. Osnivanje Zavoda ima svoje uporište i u pozitivnim propisima, a posebno je dobilo na značaju donošenjem Zakona o izmjenama i dopunama Zakona o krivičnom postupku Federacije Bosne i Hercegovine («Službene novine Federacije BiH», broj 55/06), kojim je regulisano da se za branioca, pored advokata, mogu uzeti zastupnici kantonalnih institucija (zavoda/kancelarija za pravnu pomoć).

III – FINANSIJSKA SREDSTVA ZA DONOŠENJE ZAKONA

Za provođenje ovog Zakona potrebna su dodatna sredstva, obzirom da se ovim Zakonom osniva nova upravna organizacija. Međutim, sam rad zavoda imao bi i ekonomsku opravdanost, sa aspekta razlike finansijskih sredstava koja se godišnje izdvajaju iz budžeta Tuzlanskog kantona za odbrane okrivljenih po službenoj dužnosti i sredstava koja bi bila potrebna za funkcioniranje zavoda kao nove potrošačke jedinice.

Tuzla, decembar 2007. godine

**OBRADIVAČ:
MINISTARSTVO PRAVOSUĐA I UPRAVE**

